

寶豐縣志卷

寶豐縣知縣李衍梧纂輯

人物志

汝穎多奇士漢以來卽有是言自秦易封建爲郡縣寶不隸

穎卽隸汝隸南陽者暫時耳中間析置省併大抵胥汝部

應城

自入葉  
無名時

然正史所載諸賢確指爲邑產者無幾也故於宋元

以上之鄉衮統號爲前哲不復區別蓋邵文莊嘗創此式矣

勝國迄今耳目相接志乘之所甄錄黎獻之所傳述凡夫班

聯棟梁人中杞梓皆彬彬然超軼倫輩各析所長據事直書

陳留耆舊汝南先賢安在古今人遂不相及哉

前哲

後漢

馮異

後漢書馮異傳異字公孫潁川父城人也好讀書通左氏春秋孫子兵法漢兵起異以郡掾監五縣與父城長苗萌共城守爲王莽拒漢光武畧地潁川攻父城不下屯兵巾車鄉異間出行屬縣爲漢兵所執行異從兄孝及同郡丁綝呂晏並從光武因共薦異得召見異曰異一夫之用不足爲強弱有老母在城中願歸據五城以効功報德光武曰善異歸謂苗萌曰今諸將皆壯士屈起多暴橫獨有劉將軍所到不虜掠

觀其言語舉止非庸人也可以歸身苗萌曰死生同命敬從  
子計光武南還宛更始諸將攻父城者前後十餘輩異堅守  
不下及光武爲司隸校尉道經父城異等卽開門奉牛酒迎  
光武署異爲主簿苗萌爲從事異因薦邑子鈺期叔壽段建  
左隆等光武皆以爲掾史從至洛陽更始數欲遣光武徇河  
北諸將皆以爲不可是時左丞相曹竟子詡爲尙書父子用  
事異勸光武厚結納之及渡河北詡有力焉自伯升之敗光  
武不敢顯其悲戚每獨居輒不御酒肉枕席有涕泣處異獨  
叩頭寬譬哀情光武止之曰卿勿妄言異復因間進說曰天  
下同苦王氏思漢久矣今更始諸將縱橫暴虐所至虜掠百

姓失望無所依戴今公專命方面施行恩德夫有桀紂之亂  
乃見湯武之功人久饑渴易爲充飽宜急分遣官屬循行郡  
縣理冤結布惠澤光武納之至邯鄲道異與姚期乘傳撫循  
屬縣錄囚徒存鰥寡亡命自詣者除其罪陰條二千石長吏  
同心及不附者上之及王卽起光武自薊東南馳晨夜草舍  
至饒陽蕪蕪亭時天寒冽衆皆饑疲異上豆粥明旦光武謂  
諸將曰昨得公孫豆粥饑寒俱解及至南宮遇大風雨光武  
引車入道傍空舍異抱薪擲禹熱火光武對竈燎衣異復進  
麥飯菟肩因復度滹沱河至信都使異別收河間兵還拜偏  
將軍從破王郎封應侯異爲人謙退不伐行與諸將相逢輒

引車避道進止皆有表識軍中號爲整齊每所止舍諸將並坐論功異常獨屏樹下軍中號曰大樹將軍及破邯鄲乃更部分諸將各有配隸軍士皆言願屬大樹將軍光武以此多之別擊破鐵脛於北平又降匈奴于林闔頓王因從平河北時更始遣武陰王李軼廩丘王田立大司馬朱鮪自虎公陳僑將兵號三十萬與河南太守武勃共守洛陽光武將北徇燕趙以魏郡河內獨不逢兵而城邑完全倉廩實乃拜寇恂爲河內太守異爲孟津將軍統二郡軍河上與恂合以拒朱鮪等異乃遣李軼書曰愚聞明鏡所以照形往事所以知今昔微子去殷而入周項伯畔楚而歸漢周勃迎代王而黜少

帝霍光尊孝宣而廢昌邑彼皆畏天知命覩存亡之符見廢  
典之事故能成功於一時垂業於萬世也苟令長安尙可扶  
助延期歲月疎不聞親遠不踰近季文豈能居一隅哉今長  
安壞亂赤眉臨郊王侯搆難大臣乖離綱紀已絕四方分崩  
異姓並起是故蕭王跋涉霜雪經營河北方今英俊雲集百  
姓風靡雖邠岐慕周不足以喻季文誠能覺悟成敗亟定大  
計論功古人轉禍爲福在此時矣如猛將長驅嚴兵圍城雖  
有悔恨亦無及已初軼與光武首結謀約加相親愛及更始  
立反共陷伯升雖知長安已危欲降又不自安乃報異書曰  
軼本與蕭王首謀造漢結死生之約同榮枯之計合軼守洛

陽將軍鎮孟津俱據機軸千載一會思成斷金唯深達蕭王  
願進愚策以佐國安人軼自通書之後不復與異爭鋒故異  
因此得北攻天井閔拔上黨兩城又南下河南成皋以東十  
三縣及諸屯聚皆平之降者十餘萬武勃將萬餘人攻諸畔  
者異引軍渡河與勃戰於士鄉下大破斬勃獲首五千餘級  
軼又閉門不救異見其信效具以奏聞光武故宣露軼書令  
朱鮪知之鮪怒遂使人刺殺軼由是城中乖離多有降者鮪  
乃遣討難將軍蘇茂將數萬人攻溫鮪自將數萬人攻平陰  
以綴異異遣校尉護軍將軍將兵與寇恂合擊茂破之異因  
渡河擊鮪鮪走異追至洛陽環城一市而歸檄上狀諸將皆

入賀并勸光武卽帝位光武乃召異詣鄙問四方動靜異曰  
三王反畔更始敗亡天下無主宗廟之憂在於大王宜從衆  
議上爲社稷下爲百姓光武曰我昨夜夢乘赤龍上天覺悟  
心中動悸異因下席再拜賀曰此天命發於精神心中動悸  
大王重慎之性也異遂與諸將定議上尊號建武二年春定  
封異陽夏侯引擊陽翟賊嚴終趙根破之詔異歸家上冢使  
大中大夫齋牛酒合二百里內太守都尉以下及宗族會焉  
時赤眉延岑暴亂三輔郡縣大姓各擁兵衆大司徒鄧禹不  
能定乃遣異代禹討之車駕送之河南賜以乘輿七尺具劍  
勅異曰三輔遭王莽更始之亂重以赤眉延岑之醜元元塗



炭無所依訴今之征伐非必畧地屠城要在平定安集之耳  
諸將非不健鬪然好虜掠卿本能御吏士念自修勅無爲郡  
縣所苦異頓首受命引而西所至皆布威信宏農羣盜稱將  
軍者十餘輩皆率衆降異異與赤眉遇於華陰相拒六十餘  
日戰數十合降其將劉始王宣等五千餘人三年春遣使者  
卽拜異爲征西大將軍會鄧禹率車騎將軍鄧宏等引歸與  
異相遇禹宏要異共攻赤眉異曰異與賊相拒且數十日雖  
屢獲雄將餘衆尙多可稍以恩信傾誘難卒用兵破也上今  
使諸將屯澠池要其東而異擊其西一舉取之此萬成計也  
禹宏不從宏遂大戰移日赤眉陽敗棄輜重走車皆載土以

豆覆其上，兵士饑爭取之。赤眉引還，擊宏宏軍潰亂，異與禹合兵救之。赤眉小卻，異以士卒饑倦可且休，禹不聽，復戰。大爲所敗，死傷者三千餘人。禹得脫歸宜陽，異棄馬步走上回谿，阪與麾下數人歸營，復堅壁收其散卒，招集諸營保數萬人。與賊約期會戰，使壯士變服與赤眉同伏於道側。旦日赤眉使萬人攻異，前部異裁出兵以救之，賊見執弱遂悉衆攻異，異乃縱兵大戰，日昃賊氣衰，伏兵卒起，衣服相亂，赤眉不復識別，衆遂驚潰，追擊大破於峭底，降男女八萬人，餘衆尙十餘萬。東走宜陽，降璽書勞異曰：赤眉破平士吏勞苦，始雖垂翅回谿，終能奮翼泥池，可謂失之東隅，收之桑榆，方論功

賞以答大勲時赤眉雖降衆寇猶盛延岑據藍田王歆據下  
邽芳丹據新豐蔣震據霸陵張邯據長安公孫守據長陵楊  
周據谷口呂鮪據陳倉角闕據汧駱蓋延據鞏屋任良據鄠  
汝章據槐里各稱將軍擁兵多者萬餘少者數千人轉相攻  
擊異且戰且行屯軍上林苑中延岑旣破赤眉自稱武安王  
拜置牧守欲據關中引張邯任良共攻異異擊破之斬首千  
餘級諸營保守附岑者皆來降歸異岑走攻折異遣復漢將  
軍鄧曄輔漢將軍于匡要擊岑大破之隨其將蘇臣等八千  
餘人岑遂自武關走南陽時百姓饑餓人相食黃金一斤易  
一豆五升道路斷隔委輸不至軍士悉以果實爲糧詔拜南陽

趙匡爲右扶風將兵助異并送糲穀軍中皆稱萬歲異兵食漸盛乃稍誅擊豪傑不從令者褒賞降附有功勞者悉遣其渠帥諸京師散其衆歸本業威行關中唯呂鮪張邕蔣震遣使降蜀其餘悉平明年公孫述遣將程焉將數萬人就呂鮪出屯陳倉異與趙匡迎擊大破之焉退走漢川異追戰於箕谷復破之還擊破呂鮪營保降者甚衆其後蜀後數遣將間出異輒摧挫之懷來百姓申理枉結出入三歲上林成都異自以久在外不自安上書思慕闕廷願親帷幄帝不許後人有草言異專制關中斬長安令威勸至重百姓歸心號爲咸陽王帝使以章示異異惶懼上書謝曰臣本諸生遭遇受命

之會充備行伍過蒙恩私位大將爵通侯受任方面以立微  
功皆自國家謀慮愚臣無所能及臣伏自思惟以詔勅戰功  
每輒如意時以私心斷決未嘗不有悔國家獨見之明久而  
益遠乃知性與天道不可得而聞也當兵革始起擾攘之時  
豪傑競逐惑千數臣以遭遇託身聖明在傾危溷殺之中  
尚不敢過差而况天下平定上尊下卑而臣爵位所蒙巍巍  
不測乎誠冀以謹勅遂自終始見所示臣章戰慄怖懼伏念  
明主知臣愚性固敢因緣自陳詔報曰將軍之於國家義爲  
君臣恩猶父子何嫌何疑而有懼意六年春異朝京師引見  
帝謂公卿曰是我起兵時主簿也爲吾披荆棘定閔中旣罷

使中黃門賜以珍寶衣服錢帛詔曰倉卒蕪蕪亭豆粥溲沱  
河麥飯厚意久不報異稽首謝曰臣聞管仲謂桓公曰願君  
無忘射鉤臣無忘檻車齊國賴之臣今亦願爲國家無忘河  
北之難小臣不敢忘巾車之恩後數引讎見定議圖蜀留十  
餘日令異妻子隨異還西夏遣諸將上隴爲隗囂所敗乃詔  
異軍栒邑未及至隗囂棄勝使其將王元行巡將二萬餘人  
下隴因分遣巡取栒邑異卽馳兵欲先據之諸將皆曰虜兵  
盛而新乘勝不可與爭宜止軍便地徐思方畧異曰虜兵臨  
境丑狀小利遂欲深入若得栒邑二輔動搖是吾憂也夫攻  
者不足守者有餘今先據城以逸待勞非所以爭也潛往閉

城偃旗鼓行巡不知馳赴之異乘其不意卒擊鼓建旗而出  
巡軍驚亂奔定追擊數十里大破之祭遵亦破王元於汧於  
是北地諸豪長耿定等悉畔隗囂降異上書言狀不敢白伐  
諸將或欲分其功帝患之乃下璽書曰制詔大司馬虎牙建  
威漢中捕虜武威將軍虜兵猥下三輔驚恐桐邑危亡在於  
旦夕北地營保按兵觀望今偏城獲全虜兵挫折使耿定之  
屬復念君臣之義征西功若邱山猶自以爲不足孟之反奔  
而殿亦何異哉今遣太中大夫賜征西吏士死傷者醫藥棺  
殮大司馬以下親弔死問疾以崇謙讓於是使異進軍義渠  
并領北地大守事青山胡率萬餘人降異異又擊盧芳將賈

覽匈奴莫韃曰逐王破之上郡安定皆降異復領安定太守  
事九年春祭遵卒詔異守征虜將軍并將其營及隗賢死其  
將王元周宗等復立囂子純猶總兵據冀公孫述遣將趙匡  
等救之帝復令異行天水太守事攻匡等且一年皆斬之諸  
將其攻冀不能拔欲且還休兵異固持不動常爲衆軍鋒明  
年夏興諸將攻落門未拔病發薨子軍謚曰節侯長子彰嗣  
明年帝思異功復封彰弟訢爲析鄉侯十三年更封彰東緡  
侯食三縣永平中徙封平鄉侯彰卒子普嗣有罪國除永初  
六年安帝下詔曰夫仁不遺親義不忘勞興滅繼絕善善及  
子孫古之典也昔我光武受命中興恢宏聖緒橫被四表昭



假上下光耀萬世祉祚流行垂於罔極予未小子夙夜永思  
追維勲烈披圖按籍建武元功二十八將林命虎臣讖記有  
徵蓋蕭曹紹封傳繼於今況此未遠而或至乏祀朕甚愍之  
其條二十八將無嗣絕世若犯罪奪國其子孫應當統後者  
分別署狀上將及景風章叙舊德顯茲遺功焉於是紹封普  
子晨爲平鄉侯明年二十八將絕國嘗皆紹封焉

銚期

後漢書銚期傳期字次況潁川郡人也長八尺二寸容貌絕  
異矜嚴有威父猛爲桂陽太守卒期服喪三年鄉里稱之光

武畧地潁川閩期志義召署賊曹掾

漢官儀曰東西曹掾比  
四百石餘掾比三百石

賊曹主盜 賊之事 從徇薊時王郎檄書到薊薊中起兵應郎光武趨

傷出百姓聚觀誼呼滿道遮路不得行期騎馬奮戟瞋目大

呼左右曰趨

周禮隸僕掌蹕宮中之事鄭衆曰止行清道也若今警蹕說文趨與蹕同

衆皆披靡

披普彼反

及至城門門已閉攻之得出行至信都以期爲裨將與

傅寬呂晏俱屬鄧禹徇傍縣又發房子兵禹以期爲能獨拜

偏將軍授兵二千人寬晏各數百人還言其狀光武甚善之

使期別徇真定宋子攻拔樂陽藁肥壘

樂陽縣名屬常山郡今恒州藁城縣也故

城在縣西肥壘故肥子國也漢以爲縣故城在今藁城縣西南並屬真定國壘音力追反 從擊王郎將兒

宏劉奉於鉅鹿下

兒音五突反

期先登陷陳手殺五十餘人被創

中額攝幘復戰

攝猶正也劉破曰按幘爲馬扇漢期被創中額則是幘字

遂大破之王郎

滅拜期虎牙大將軍乃因間說光武曰河北之地界接邊塞

人習兵戰號爲精勇今更始失政大統危殆海內無所歸往

明公據河山之固擁精銳之衆以順萬人思漢之心則天下

誰敢不從光武笑曰卿欲遂前趨耶

唯天子得稱警蹕

時銅馬數十

萬衆入清陽博平

博平縣名屬東郡在今博州縣也

期與諸將迎擊之連戰

不利期乃更背水而戰所殺傷甚多會光武救至遂大破之

追至館陶皆降之從擊青犢赤眉於射大賊龔期輜重期還

擊之手殺傷數十人身被三創而戰方力

力苦戰也

遂破走之光

武卽位封安成侯

安城縣名屬汝南郡故城在今豫州汝陽縣東南也

食邑五千戶時

檀鄉五樓賊人繁陽內黃

繁陽縣名故城在今相州內黃縣東北內黃故城在西北

又魏

郡大姓數反覆而更始將卓京

京或作原

謀欲相率反鄴城帝以

期爲魏郡太守行大將軍事期發郡兵擊卓京破之斬首六

百餘級京亡入山追斬其將校數十人獲妻子進擊繁陽囚

黃復斬數百級郡界清平督盜李熊鄴中之豪而熊弟陸謀

欲反城廼檀鄉

反音翻

或以告期期不應告者三四期乃召問

熊熊叩頭首服願與老母俱就死期曰爲吏倘不若爲賊樂

者可歸與老母往就陸也

必以在城中爲吏不如爲賊之樂卽任將毋往就地

使吏送

出城熊行求得陸將詣鄴城西門陸不勝愧感自殺以謝期

期嗟嘆以禮葬之而還熊故職於是郡中服其威信建武五

年行幸魏郡以期爲太中大夫從還洛陽又拜衛尉期重於

信義自爲將有所降下未嘗虜掠及在朝廷憂國憂主其有

不得於心必犯顏諫諍帝嘗輕與期門近出

前書武帝將出必與北地良家

子期於殿門故曰期門

期頓首車前曰臣聞古今之戒變生不意誠不

願陛下微行數出帝爲之回輿而還十年卒

東觀記曰期疾病使使者存問

加賜醫藥甚厚其母問期當封何子期言及國家恩深常慙負如死不知當何以報國何宜封子也上甚憐之

帝親

臨穽飲贈以衛尉安成侯印綬諡曰忠侯子丹嗣復封丹弟

統爲建平侯

建平縣名屬沛郡故城在今亳州鄆縣西北一名馬頭城

後徙封丹葛陵

葛陵

縣名故城在汝南故鮑陽縣也

丹卒于舒嗣舒卒于羽嗣羽卒于蔡嗣

案馮異傳因薦邑子銚期叔壽段建左隆等光武皆以爲掾

史則期等與異同爲父城人而期傳又云潁川邠人據後漢

書章懷太子賢註父城縣名故城在今許州葉縣東北汝州  
郊城縣亦有父城蓋漢父城之境毗連兩縣故姚期傳著其  
占籍在郊當由於此今據馮異本傳引以補志非牽附也

叔壽

後漢書光武紀建武元年十二月丙戌破虜大將軍叔壽擊  
五校賊于曲梁戰歿

段建

案陳觀記及續漢書段並作殷無傳事佚

左隆

無傳事佚

三國

馮熙

三國志注吳書曰權遣立信都尉馮熙聘于蜀弔備喪也熙字子柔潁川人馮異之後也權之爲車騎熙歷東曹掾使蜀還爲中大夫後使于魏文帝問曰吳王若欲修宿好宜當厲兵江關縣旂巴蜀而聞復遣修好必有變故熙曰臣聞西使直報問且以觀釁非有謀也又曰聞吳國比年災旱人物彫損以大夫之明觀之何如熙對曰吳王體量聰明善於任使賦政施役每事必咨敬養賓旅親賢愛士賞不擇怨仇而罰必加有罪臣下皆感恩懷德惟忠與義帶甲百萬穀帛如山

稻田沃野民無饑歲所謂金城湯池強富之國也以臣觀之  
輕重之分未可量也帝不悅以陳羣與熙同郡使羣誘之陷  
以重利熙不爲廻送至摩陂欲困苦之後又召還未至熙懼  
見迫不從必危身辱命乃引刀自刺御者覺之不得死權聞  
之垂涕曰此與蘇武何異竟死於魏



烈士

砥節首公棟梁儒肆國有人焉桑梓崇望

惠民正統歲貢生任江西饒州府推官爲政平恕一時冤獄多所平反

何春字景新成化貢生任陝西興平縣訓導後緣事降湖廣河治所大使爲人溫厚和易讀書作文老而不倦待後生小子循循善誘

何節字志堅成化歲貢生任上林苑錄事蒞官謹慎勅賜褒勸進階登仕郎

任傑字漢佐宏治歲貢任直隸青縣知縣爲人醇厚居官謹恪

寶豐縣志 卷之三  
申奉字敬之宏治歲貢生爲人謹密鄉里景仰終身無間言  
李瀛字淵之號梅軒宏治歲貢生任直隸淮安府海州同知居  
官清明篤於惠民海人有政服民心德化強暴之謠

田洹字邦正宏治乙卯舉人任山西華陰縣學教諭性聰敏博  
學詩文高古爲人端正

袁道字時濟宏治乙卯舉人未仕而卒穎悟過人讀書史成誦  
不忘

劉奎字應文宏治戊午舉人任直隸深澤知縣博學好古尤耽  
於詩興王蒼谷何景明相友善蒞官清苦蕭然而歸閉門杜

守甘心淡泊

張介字廉夫宏治甲子舉人性度孤特詩文音古

丁運字時泰正德歲貢生任直隸隆慶州吏目有才幹蒞政剛果用刑不妄扶善鋤強士民仰慕

陳嘉行字修德幼業儒長肄業太學及銓選領銅陵簿署知縣事吏治民安考績後列章薦擢以老乞致仕歸嘉靖三十年卒邑進士李秉仁題其墓

劉愛字本仁嘉靖十八年貢賦性耿介教子嚴明敏政其子也  
劉敏政字周化嘉靖甲午科亞元性恬雅任直隸河間府通判署宣府中路督軍餉以廉能著聞屢經保薦陞山東平度州

知州復陞松江府同知後緣應天巡撫趙忻事左遷大名府

通判

白珩字廷珍縣三里商酒務人剛直不輕然諾嘉靖庚子鄉飲  
介賓子元中嘉靖己酉科舉人任景州知州平涼府同知  
衛奎字文正嘉靖歲貢生任大明府訓導陞遼東廣寧衛教授  
致仕持已不苟甘心淡薄

田同字養民嘉靖歲貢生任威縣訓導陞保安州學正致仕性  
敏學篤議論詳切

扈延吉字應善嘉靖歲貢生任山東淄川知縣名聞當道屢經  
保薦勤政有爲因疾致仕

牛瑀字君胤嘉靖歲貢生性特不苟任陝西鄜州訓導

白欽由拔貢仕至延安府同知嗜古博學白雀寺考辨可見一斑其他著作惜淹沒不傳

朱杲字東升由歲貢任邵陽訓導後陞周府教授其墓碣勒周藩令旨云爾教授杲來官子府一十二載勵翼惟勤忠直耆德可則可準正予人惟求舊豈爾高志乞休去意既決不復固留念爾贊襄云何以酬合宜遵照奉准聖旨照依進階事例允爾長史之職封爲奉政大夫致仕以榮終身欽哉嘉靖三十四年二月初七日

右李宏志野乘

國朝

吳宗孟字孟嘗號汝瀾順治丙戌進士己丑殿試授雲夢縣知縣以賢能擢工部屯田司主事監督琉璃廠旋出督淮安清江廠所歷具有善績盜陽張榕端誌其墓

董上國字贊辰號昌漁初任南陽縣教諭後陞靈壽縣知縣蒞任之初殲巨猾鄭保林等革雜派諸弊縣有官馬一項分撥民間有分馬厘等名色每一厘納制錢十十有奇上國力言之當事除其政民刊謳德錄以頌之其林下詩文二卷藏於家未梓

案陸清猷嘗稱上國爲董君子見其年譜

鄭維雅字寧野號潛庵順治甲午初任宜陽縣訓導陞貴州衛

經歷因病乞休回籍康熙庚子邑令李聘修邑志

王省字以魯號聽齋由教習任山東高密知縣仁聲丕著民多德之

王顛生字叔仁學博行醇士林仰之邑令靜江楊家修榜其門曰汝南文獻

鄭還雅字汝寧知府寢昌長子性豪邁志氣卓犖能文章善騎

射明末倡舉義兵保障一邑膺順治甲午歲薦選開封府尉

氏縣訓導陞貴州敷勇衛經歷子謚邑庠生亦恂恂鄉里間

朱旭字亮甫號松湖士林推爲忠厚長者任山東東阿縣丞順

治庚子撫臺賈聘修邑志

吳垣字翰宸號雲巖生有異質好學不倦年十六居母蕭宜人  
喪哀毀過禮康熙己酉舉於鄉乙丑成進士授庶吉士丁卯  
改檢討壬申冬以終養告歸旋丁贈公憂辛巳入補與修

國史及校錄

御纂諸書戊子遷贊善己丑視學浙右甲午晉侍講學士典試浙  
江所取皆名下士時論重焉越明年致仕丁酉以疾卒同年  
德州孫勳銘其墓

姬祚綿字鶴齡由歲貢任開封教授與朱旭並稱長者子維藩  
字价人爲名諸生

王培生字公載號勇菴姿兼人賦性卓犖康熙甲子舉於鄉



乙丑成進士鄉會科目與祖之晉符台士林稱爲盛事時年甫逾弱冠下帷講誦視諸生侍攻苦如是十年銓授瀏陽知縣時朝議以湖南地荒虧額勒期報墾公獨抗言地異肥磽民殊貧富安得一概繩之力爭不已當時者不能奪瀏人至今德之旋晉戶部湖廣司主事告終養歸所著有春秋解易解雙柳軒詩文四卷未梓

李宏志字亦重號橋水晚號二癡霸州通諸經尤工古文詞縉健清迥直入歐曾之室而躋其截要爲自然流出非矜心作意以求肖也家世宦族而乏中人產以授徒自給數用脯修資購書藏度至萬餘卷多人間秘木鍵閤却掃日游泳其中

淳蓄融貫爲淵博無涯淡必求合於大道以不肯程朱爲歸  
宿性褻特雖不以所能高人而恥污詖謁芒鞋青粥悠然自  
得榮利之念淡如也年甫四旬失偶卽不復娶晚年聲實益  
著執經請業者步武相銜開襟誘迪人人履屐所欲以去四方  
碑版金石亦必以得其文爲重前政馬延以修邑乘典核有  
義法識者謂可媿崔后渠安陽志授涉縣教諭力辭不赴里  
人重之至今羣稱爲橋水先生如邵康節之在洛下兒童走  
卒皆知嚮慕所著諸書藏於家

李海觀字孔堂號綠園祖居新安遷于縣七里宋家寨乾隆丙  
辰恩科舉人江潛好學讀書有得及几所闕歷輒錄記成帙

每以明趨向重交遊訓誡子弟襄城劉太史青芝稱其有志  
斬伐俗學而力涸筋疲千茹古非虛也任貴州印江縣知縣  
以老告歸著作詳後子邁官御史迎養京邸卒年八十有四  
楊元振字明凱店頭鎮人雍正癸卯拔貢任林縣儒學教諭弟  
仲振字箴菴戊申選拔貢生兄弟共有文名

王嘉謨字孔彰雍正丙午科舉人任湖南宜章縣知縣居官廉  
直勤於政治事載宜章縣志

程嘉言字懿先癸酉科舉人優於文學

李邁字衛多印江縣知縣海觀子乾隆乙未進士除吏部主事  
阿文成公以大學士總理部務特相引重有疑難輒委誠取

決屢遷至本部正郎出理七省漕務發姦摘伏門無私謁歷  
江南道御史工科給事中感 恩納節振明綱轄不輕事彈  
擊外轉江西督糧道厘剔弊竇廉明而出以仁恕一如理漕  
務時移病歸里病痊兩典山右書院被其指授者多發名於  
世內行修飭待昆季及疎族胥有恩紀又置腴田四百畝屬  
從子經理爲祀先資彌留之際惟以績學禔躬推行先緒勗  
諸子語不及私遽博洽工詩古文詞

李韓字愧石學於叔宏志品端學富由貢生任陳州府淮寧縣  
教諭

劉文博字載籍增廣生持身端介爲鄉里推重長子瑄早亡婦

趙氏年二十字節姪孳亦早亡婦程氏年十九字節男女四十餘口同居無間言文博之教也

邊之垣字漢公縣七里西寇召人寧靜寡欲善處里黨好讀書不干名譽知縣馬舉爲鄉飲介賢壽至九十二歲

何羽翀字峻飛縣七里濱陽鎮人性端謹處鄉里不與人爭教弟子率多成名由附生舉優食廩餼後知縣徐又舉爲鄉飲大賓貢滿任杞縣訓導

溫慥字磊園愛究性命之學時坐茂林聽流泉以自怡賞劉兩前政造其廬未晤歸遇隴畝中坐樹下談竟日其風概如此范華字西峯號桂巖性卓犖博綜羣籍工屬文嘉慶辛酉副中

寶豐縣志卷之十二  
州賢書事繼母養志承歡無不周之隱友愛諸弟尤嚴家範  
以稽古裨躬教子姪讀書談義夜闌不休以爲常門以內雍  
雍怡怡秩秩如也歲壬申學使者校士華母弟密墀子德光  
從子德房同列高等從子德榜復以第一人入於庠前政秦  
手書楹帖以贈曰栽培諸子分強水領神羣英列泮池與同  
人刻丹桂籍惜字律并捐錢十萬助修春風亭其他趨嚮名  
義皆類此

范密字孝聞號時峯廩生常範子嘉慶丙子科舉人生周歲母  
王氏見昔事繼母田氏如所生田氏性賢淑喜子姪勤學密  
窺母意曉少攻苦以承其歡訓子課姪隨方誘迪使各成立

母時含笑謂家人曰兒孝順通徹扇枕卧冰者又何足云嘉慶十八年歲大饑華以二百金助賑二十三年以四百金助匏子役皆遵母命而行爲前政所敬禮手書門榜以贈密所著勉人爲學說深切警闢可以訂頑立懦

盛健一字徠公號東軒邑庠生膏與千叟宴語詳前健一敦孝友飭檢格爲閭邨所推籍蠻觸蝸角得其一言如視少賓忿戾頓釋工書善爲詩尤精於醫幾於十治十全創修撫流橋施義地年八十七終里人震悼以品高德淑額其門

張曦字東白號歸真子歲貢生清高有至性工詩畫嫻琴瑟造次必以禮放佚人見之皆爲改容

李愷歲貢生字次况號顧廬八歲母王氏卒擗踊投地絕而復蘇勺水不入口者數日繼母孫氏多病湯藥必手奉中夜數起省視以爲常家素貧刻苦力學二十餘入邑庠試輒冠軍屢入省闈迄今不第家授徒成就後輩不下數十人年七十四卒子五人金臺舉於鄉金誥邑庠生均博學工詩文

張聆字西嵐號返樸 恩貢生從胞兄曦學尊之如嚴父食餼後寢饋理學宗傳諸書尤以周子主靜說守爲學要每與兄論心性往往至夜分不倦

溫豪字伯起號雅石歲貢質直樸素學行卓越傳記叙跋人以得其手筆爲重求者如市肄業大梁書院與山長陳官詹子



本忠結殊契及本忠典河南鄉試豪引兼不與試其澹定如此

李廣輝字萬程號樸齋歲貢生性敦厚耽精羣籍幼失恃事祖母以孝聞所讀經史俱手自繕錄於易尤細加批抉課子以嚴典教白雀書院

李于潢字子沆號李村拔貢生江西督糧道李蓮子少有異才經史百家之書無所不讀年十七受知學憲姚文田補邑諸生屢試冠儕偶顧獨喜吟詩承綠園祉亭之家學含宮咀商不懈而及於古年二十已積成卷軸及壯遊齊魯吳楚間與其賢士大夫相切磋詩乃益進所著方雅堂集大梁書院山長錢爲換其詩李觀察捐俸授之梓

余健字法乾號琴亭博洽精四子書爲學者講授領機發難滾  
滾如丸走坂不須橫冊於几成就多人歲貢常淑軾舉人牛  
芳廩生余魁五尤其入室弟子

余紹曾字魯堂號竟園一號春橋邑增生詩文高古不落煥恒  
兼工書畫書學蘇長公畫師倪雲林亦間出入於米氏父子  
風操俊雅爲時推重

王松濤字雨亭號曉嵐廩生幼聰敏嗜讀書博洽多通尤深於  
詩識者以爲近盛唐嘗輯孝子悌弟貞女烈婦軼事未著者  
爲一書以闡揚之喜扶樹後輩窶人子賴其箴迪皆有所成  
就治家嚴教子有法則

忠烈

勦以忘身忠偏致命皆正氣之所存綱常賴以維持焉湘東金管當樂爲斯人濡毫

明

李得笥明史李貞佐傳寶豐之陷也舉人李得笥短衣雜衆中爲所執賊謀主盧氏牛金星者故舉人也勸賊重用舉人賊所至獲舉人卽授以官得笥終不自言賊莫知其爲舉人也役使之不肯伺賊寐將刺之賊覺被殺或告賊曰此舉人也賊懼棄其屍而去

李猷吉字純自由歲貢任授山西臨晉訓導直指使至詢地方

利病侃侃敷陳條析縷舉直指喜檄攝萬泉縣事嗣改南陽  
教諭崇正辛巳賊圍南陽公指明倫堂曰此吾死所也城陷  
猷吉死之

陳佐舜由歲貢任四氏學教授持身嚴重居官清介致政家居  
崇正壬午冬闖寇破城迫索金幣舜曰吾素寒士也薄宦數  
載囊遺二百金已罄此邑人所素晰賊旁數人皆曰然陳官  
人無蓄也賊曰觀爾多善氣釋爾其隨我飲食舜恥之不從  
遂餓死於灌蔬園壁有留題云此菜不殊薇蕨菜此間卽是  
首陽間

趙含玉素多義豪俠自任流賊大亂公舉首領統率鄉兵防守

城池後寇襲城玉夜戰死開闢賴以無恙邑人感悼爲立祠於東關三元宮內

杜襄邑人龍安守杜齊白之家奴初名鄰楚幼參於杜隨主姓有勇力識機變先闖賊偽署邑武生陳四對爲游擊邑民何英爲守備自成去洛陽主簿周之德來權縣事四對猶依違英獨岸然職官錦衣華服乘馬張蓋時襄爲練總率衆討英遂誅之襄更築外城以禦寇盜嗣官軍敗襄與之德俱被害按杜襄事見馬志義勇如襄僅附見於兵燹條內殊爲失居今特表出之



孝友

養志承歡與夫鴿原之急人紀也疲精瘁力而不渝豈以爲名然而德星社闕下林芬騰緝帙

明

喬遷字進之宏治歲貢生父端卒於官遷萬里奔訃扶柩而歸建水趙知州嘉其孝行有天涯風木詩并送喬秀才奉親喪歸河南序

洪淮石渠保人母死哀毀踰禮衣衾棺槨必誠必慎既塋廬於墓側三年手植松栢日有野鵲巢其上又有燕巢於墓廬狐兔馴擾不驚有盜聞之亦感其孝爲致奠禮淮以其禦得之

物不受

陳策邑庠廩生石渠保人陳名之子母死送葬之墓其父謂曰  
日夕可歸矣策應曰父先見次之父歸竟無返志鄉人勸之  
亦不荅父令家僕伴宿策密遣僕歸不令父知策乃自搆容  
膝草舍寢苦枕塊日夜號泣獸蹄鳥跡交於塋中恬不爲恠  
嘉靖十一年知縣辛柱奏聞旌表有石坊在學宮右

李秉仁字子元號西塘嘉靖壬辰科進士未及廷對以母病馳  
歸至乙未始登第觀政銀臺未仕而卒

徐文旆嘉靖甲午遜貢母死哀毀爲孺子泣旣葬廬墓三年時  
有異草生於墓壁靈鳥巢於塚樹繼而父亡哀慟廬墓尤踰



其母嘗作思親詩百絕人爲之歌曰孝矣哉徐栢林生異草  
產靈禽初任陽信丞遷吉州判官興縣知縣萬歷九年入祀  
鄉賢

何鯉商酒保人貢生何偉之子生母先亡鯉方二歲繼母霍氏  
撫鯉成立後霍氏亡鯉感霍氏撫育之恩追二親未盡之孝  
結廬墓側盜過不入知縣邢仁嘉其孝旌之

白亮奉養二親竭誠盡愛後蒙表揚

國朝

楊際春字和風天性敦厚雅志詩書事繼母以孝聞友愛諸弟  
教子姪尤有度法門內雍肅從子篤學從孫溥皆早歲入庠

康熙乙亥邑當輸餉際春毅然身肩其事晚年尤不失佚惟以勤儉督其家生平善行聞於鄉里

趙起璉寶邑武生八歲喪母父繼妻陳氏璉愛慕如生母及就外傳母或督責之起璉唯唯聽命父歿繼母年老舉步必親自扶掖病侍湯藥不離左右病愈方出門親友見其面目憔悴咸嘆曰母病子亦病真孝子也繼母性慈惠好周恤璉承母命無不遵從助從姪天奇葬父助天奇子娶妻及鄉黨聞升斗借貸概不求償皆承母志也

事見楚撫雅爾圖中州彰善錄

趙淵儒寶邑人事親孝父修身年七十餘淵儒承歡左右盡誠色養母故哀毀骨立恐傷父志日則稍展顏色俟父寢竟夜

悲泣事伯父修已叔父修義敬愛兼至間五六日必延至家  
設酒食與父歡飲白頭兄弟一堂笑語令子姪輩環侍奉節  
以娛其親叔父修仁早故有弟三俱幼淵儒迎養資爨嫗撫育  
幼弟二弟洞儒從師赴試束修資斧必爲預備及長俱爲之  
授室從兄清儒從弟淳儒業農乾隆四年牛疫盡死淵儒助  
銀各置牛具以資其耕族弟綱居他村淵儒念之召回本村  
與屋以居弟綱聘娶同里劉德全貧不聊生淵儒與之屋助  
以粟麥復給豆一石令磨腐以資生計木村有沙河每至冬  
月冰沙難渡淵儒捐建木橋以利行人旣膺村長時以孝弟  
勤儉逐戶講解盡勸心化一方共率其教

范馥寶邑學生幼失怙父繼娶劉氏馥事同生母劉氏卧病數月馥侍湯藥晨夕不息兄弟四人馥行三父没凡有所爲必稟命於長兄馨繼聞家人有分析意馥痛哭以勸得遂同居兄弟妯娌毫無間言馥不蓄私財所入館穀盡爲家中公用一錢不入私室

任文學兄弟三人長願學出遊在外次博學久經分析文學獨力養親父母繼没長兄久客不歸室有二女文學皆擇婿助資家之並迎養其嫂以次子爲之嗣次兄死一姪旋天遺孤姪孫幼小文學竭力撫字代爲經理家計所入稞租別登以簿姪孫長悉以歸之鄉鄰陳敬赤貧死無塋所文學助銀塋

之鄰人安姓年逾三十貧不能娶文學貸銀得娶一鄉之中  
戚目爲長者

段評寶邑二里監生篤於友誼兄謙有通四十金破索無措評  
備本利貸償弟詢貧困評贈五十金經營生計族姪維典地  
貧不能贖評備價代贖給維耕種其他周恤親鄰不一一數  
也

楊士英寶邑人成童卽以孝聞居父喪致哀盡禮母患足疾久  
不愈遍求良醫焚香籲天日寧促我數年以舒母一日之痛  
兄弟分產辭豐受膏旣析居長兄日積逋士英乃質田二十  
畝償之

徐興孝字百行寶二里徐庄人幼善事親壯而彌篤其母病藥必親嘗危則默禱諸神願減已年以益母壽人以爲名實克副云族兄興讓死貧無以殮助棺葬之里人王維寧煢獨無偶贈鏹四十俾得成室生子以繼其嗣村南施地五畝收埋骸骨至凡解衣推食之事有不能悉數者

任永肅字雨若縣二里任家寨人弟永哲析居後貧無子及卒妻孟氏無依永肅養之乾隆四十三年比鄰孫某貧欲鬻妻永肅出金贖歸且給粟以贍養之

王守曾縣六里曹鎮人習孝經父端病故守曾甫十二歲哀毀論禮守七年娶陳氏未一歲而母路氏疾纏綿床褥守曾衣

不解帶藥必親嘗母卒喪盡禮泣血三年形容骨立夫婦  
遂相繼亡無子以姪活爲嗣縣人李海觀嘉其孝爲表其墓  
王朝選字萬青縣六里人少讀書識大義父母早沒依諸兄成  
立以悌聞

岳綸字言發縣二里袁家庄人少孤貧母張多病綸侍湯藥屢  
久不倦性更儉樸遇義所爲絕不吝惜堂弟紀貧周金四百  
堂姪廷選母生爲贍養歿爲殮葬乾隆四十三年歲飢鄉里  
貧乏者綸成出粟濟之村北臨汝水舟楫橋梁皆綸一人出  
貨修焉子廷舉人亦謹厚候選州同孫鍾靈鍾傑邑庠生

何建瑛字修常庠生滎陽鎮人少失恃事父孝謹父歿事恃母

寶豐縣志 卷之十一  
尤孝貧無立錐舌耕以養繼母未臥病十餘年挽侍湯藥始  
終無倦

楊琬字輝之家貧力耕以養母每飯塾候母食畢然後自食母  
顧子不肯屬饜也其妻王氏竭力爲母具甘旨母必與琬其  
琬少嘗卽以爲飽母八旬餘失明琬夫婦相繼沒琬之子名  
聲代琬養每食必以嚮進稱貸於梓里幾遍而已時有菜色  
突有異人持兩千金贈名聲治生以養祖母名聲以家貧不  
敢受其人留金竟去遍踪之無所遇

楊克長字元亮監生與妻路氏並善事雙親母沒父老而失明  
夫婦曉夕上食親奉敦牟側立視父著所向以器就之克長



守敦就生平未嘗有急步疾言人以爲順德所著克長以子  
貴贈奉直大夫路氏贈宜人復以節孝被旌入祠

陸雲峰字勝巖號水滌太學生幼孤母老而病扶持抑搔聆息  
喻指不遑假寐者逾二十年母病亟雲峰重趼百舍延醫調  
治因而肄力岐黃之書久之得其元微有所請者無寒暑遠  
近必至全活甚多培養弱弟輩聲庠序雲峰幼貧甚生計少  
敷牧恤族姓振貸避荒之民不使鬻其女義名噴噴郡邑間  
其沒也前政賞輓以額

杜炳素業農性至孝父沒母老而瞽炳事之益謹每力田度母  
饑必歸度母渴必歸家乏儋石儲而慈闈甘旨無缺其母好

晨食熟糗妝所居去市二里許炳曉起往購奔以歸惟恐寒而母不樂食也久之其母益衰憊四肢曲孿炳親自扶扶時其抑搔寢以身溫被起以身溫衣燂湯淨睡二十年如一日閭里推藉格及頑梗今炳卒已久舊鄰武媪猶能曲傳其孝謹之狀

徐邦召字應聘監生事繼母爲閭孝闢扼恤困善行未易僂指數

郭召南字布文生員七歲喪父事母養志承勸務竭已力雖倉猝不少懈恭厥兄有劉瓛之風因心篤慶見重榆鄉

丁偉生員事父母承勸於形聲之表父旣哀事之益謹續飯畢

勤讀誦夜無倦容家人稱嘆字及鄉閭

杜琳字佩玉監生父天一晚年患病跬步需人性復嚴厲少拂意則怒琳察息審指志得意先十餘年無纖隙人以爲難

郭丙南字際午廩生事繼母孝謹家乏中人產食指繁多弟與姪皆幼丙南以舌耕取給并課之讀弟位南入邑庠姪楨舉於鄉丙南敏文思日成十餘藝尤善於誘迪汝魯郝寶士爭來就業隸博士籍者百餘人子枋廩生

郭純修字乾若監生繼母翟氏少純修三歲早寡純修亦失偶爲子早婚令子媳與繼母同居後院已居前院囑其子曰汝善祖母卽善事吾也平時溫清分責於其子若媳已立室外

問安否而已朔望重令節必具珍饈令子引已至室一拜而  
立毋與語則對命去則退遠出入亦如之毋有疾則令其子  
若媳倍加孝謹已延醫調治湯藥必嘗廢寢志餐鄉里見純  
修色憔悴卽知其母有恙也晷沒時純修已年踰八旬衣衾  
棺槨拜跪哭泣一一如禮

明尙琮字廷瑞武生事兄尙珍如童子時兄或外出雖更闌必  
待其歸兄病侍湯藥衣不解帶痊可寢始安兄性嚴尙琮雖  
白髮有過必督責尙琮齋顏承之畧不少拂人以爲難

義行

俗以伊蒲塞爲行善捨宅爲寺歛貲建廟豪舉乎一瓦坐將  
千金還耳惟天助賑繕費舍與補緝橋梁拾金不昧乃足以  
裨風化而於人有濟

聖  
天子設異格以褒嘉有志者當審所處

明

扈敬父城保人正統初輸粟賑荒奉勅旌表義民勅曰勅河南  
南陽府汝州民扈敬國家施仁養民爲先爾敬能出粟麥豆  
一千一百四十石用助賑濟有司以聞朕用嘉之今遣行人  
齎勅諭爾勞以羊酒旌爲義民仍免雜派差役五年尙免

忠厚表勵鄉俗用副褒嘉之意欽哉故勅正統三年六月二十五日勅鑄於父金德墓碑時爲隆慶三年後邑人景州知州白元有記

蕭湘祖世同居至湘已七世矣男婦四百有奇從無間言湘爲人質直家法嚴肅家有祠凡有過者罰處祠中讀其祖世家訓改而後已祠左右爲書舍子弟讀書其中每夜分聚衆家祠令子弟講司馬溫公家範柳玘浦江鄭氏家訓等書嘗至達里湘性嚴重其長子愚次子懋俱鶴臚寺序班冠帶見湘湘怒曰爾以蟻子職輒欲加布衣之親乎二子愧謝自是不敢以公服見里中輕簿子或謂之曰昔張公藝九世同居後

蒙高宗幸第今豐邑豈大駕所及公共移居泰山諸子弟不能平湘曰若以我爲名乎汝曹第率祖訓守家法禮義之不愆何恤人言由是子弟皆不敢言直指方大美嘉其義請於朝萬歷三十六年立坊旌表

張振字奇泉石渠里人知大義尙氣節篤敬愛於嫂姪之孤寡時解推於閭井之饑寒崇正十一年巡按金光宸具奏旌爲善人

梁進文萬歷間捐貲五百金獨力重新泮宮規建櫺星門魁星樓並周圍宮墻知縣邵建封教諭彭欽爲之立碑學宮

杜齊白字青蓮萬歷己酉舉人歷官至龍安府知府居鄉好爲

義舉

國朝

宋師範字正范附學生明末鬪逆之亂范負母避居舞陽傭工  
養親及歸里招集族人兄貢生篤來自陳州兄郊來自鄧遺  
以粟米田宅年五十無子族人爲之買妾師範辭焉招妾父  
給金遷之是歲妻生子實粟早歲入庠里有閔帝廟捐田四  
十餘畝年七十而卒

何銘寶邑四里人雍正三年銘於里中立龍溪草堂捐備膏火  
延師訓學村西舊有大渠銘倡建便耕橋以利行人山西窰  
匹韓進忠年六十餘孤苦無依銘收恤數載以粟借人從不



以利或遇貧民或逢歉歲卽不責償

譚得道寶邑四里監生父誥縣學生與李得公友善得公病臨終託孤月兒於誥並銀十三兩地一區月兒時甫六歲誥爲之擇師定配撫若親生誥歿得道與弟庠生得中仰承父志弟視月兒追月兒成立得道舉銀地及歷年餘息按籍交還毫無染指

李洪烈寶邑人爲人傭工乾隆丑年於郊縣甯富街拾銀一封重八兩時烈方爲人驅驢不得已持銀歸家貼字求主已而山西人張洪文尋至詢係所失烈卽以付之洪文欲分半以酌堅不受

陳廣才字漢卿世居青嶺陳家庄爲人樸誠好施乾隆六年歲  
饑出粟活人甚衆知縣唐給額旌門子疇字洪九承父志乾  
隆十四年春饑復出粟存活饑民爲社倉長氏借穀力不能  
完輒爲代納遇橋梁廟宇傾圯獨捐貲修補亦不勒石沽名  
王廣福字遐嘏縣武生性好義補邑四里路八處九里設義學  
教村中子弟開湛水渠十五里惠民渠十里鄉民賴之立碑

以紀

李意字廉甫號晚香性豪邁好結納以貢生以國子監肄業敦  
義不倦卒年八十

董芳字馥聞縣四里人慷慨好施村東有水碍行路芳建應龍

橋以便往來撫憲以銀牌及匾獎之

李從趨字則野縣二里人孝友重然諾尤精醫術門恒如市時有行路病疫者十餘人貧無醫藥卧廢垣從趨見之投以藥月餘皆愈各給斧資遣歸子斌字文輝能承父志歲荒市一僮居歲餘一日斌見僮有淚痕問之僮曰兩世孀居僅此孤身向爲人誘賣未知祖母與母存亡斌厚給使歸里人義之秦璉字崑壁監生縣五里高鐵爐人性醇謹好調恤乾隆十九年知縣徐旌其門

張問明字遠公附學生明義士張振之曾孫也少失怙奉母以孝聞坦白好善鄉里稱之初問明承父珮意以堂伯食指繁

助田數十畝宅基一處又張世戚及劉某俱孤貧無依問明  
皆收養之卒爲立碣墓前族孫繼如問明爲延師給以膏火  
之費

岳紹字述之縣二里岳家寨人堂兄四人俱貧紹常賙濟之族  
中有不能成室者皆爲娶妻乾隆二十三年太康縣民許天  
成因饑自鬻其妻紹與金贖出勸之歸家

鈕潤邑監生事親以孝聞里黨姻族有貧乏者無不周恤所居  
村路遇雨多泥濘坎陷潤爲墊修平坦以利行旅

李忠字孝移縣一里曹家坑人持已有古風嘗於村前後獨力  
修石橋兩座衆欲立石表之忠阻止不居其名

陶承業縣六里人樂善好施與閭里貧乏者賴之中丞雅旌其門

趙天紹字繩武張村人候選州同知居近養水行者病之紹父建德欲造石橋未逮卒紹承父志成之費至千金

龐焯字應南宋村監生性仁厚好施與歲饑減價糶糧里人賴之其弟煊亦誠實端謹一鄉稱爲長者

馬綱字維三號枳亭道光十年歲貢性孝友嗜學前政賞延以課其子歷九年語不及私與里人處恂恂若無能者臨事則明敏嘉慶庚申霧市莠民弄潢池兵綱率義勇相機捍衛前政印深依之

寶豐縣志 卷之十一  
三  
范常生監生嘉慶三年於所居村築土寨周圍二十畝餘以自衛無何教匪竄入邑境剽殺人四方戚友競避於寨中男女數千指無所得食常生盡出所蓄雜糧數十石以給事平谷製集餌申謝常生概弗納

楊克類字紹先布政司經歷敦樸有爲嘉慶庚申教匪滋事避難城中者數千指胥斷炊烟克類運粟周之多至四百四十石率子楊岳胞姪楊岱往來親運不避艱險中丞馬以尚義可風額其門又旣以綺及器皿

楊岳字維崧性篤謹儉以自奉而好施與嘉慶癸酉歲歉借給本村各戶口糧谷二千八百石不受償還並捐粥賑銀五十

兩又先後捐錢二百一十五萬助增書院膏火普濟堂養贍  
及補修城垣建留養局中丞上其事奉

旨以綽楔表厥宅里又於雅集流水處建石橋三座其長子楊源  
清亦重修東北二閘橋梁次子楊溯清捐助義學經費錢六  
百千得邀議叙善善相繼鄉里稱之

楊岱字覲東號魯庵布政司經歷世以孝友爲鄉人所敬仰岱  
性聰敏重修黌官先支塾數千金旣歸楚又捐錢甚巨同刊  
丹桂籍惜字律功過格等生平愛集書多至數萬卷癸酉歲  
大饑施麵助賑更贍給戚友待以舉火者百餘家年餘不間  
前政高贈以名揚尙義額秦增以誼敦任卹額學憲周贈以

積善有慶額前學憲姚文僖尙書手書楹帖贈之曰朗矣清  
懷若初月超然和氣是春風

楊岸清字鏡湖號觀亭庠生操履恪謹樂施與其蒙師王觀風  
家貧月給粟以養之者數十年先後捐錢二百四十七萬助  
增春風書院膏火普濟堂養贍及修補城垣程大中丞旣以  
樂善培英額其門復上其事奉

旨賚銀榮以坊又因勸修十里義學捐銀三百得邀議叙諸如建  
茶亭修路橋刊達生篇助刊孟子讀法等書所費多至數百  
金又割熟地五十畝爲施茶資其沒也書院肄業者百二十  
人製錦勒女以彰其善里人爲樹門榜曰德高榆里羣推書



院山長耿謨議行錄附以所著家訓數十條學憲周題籤署  
縣帥書刊以行世

秦蘊炎字位南州同仁厚尚行誼里中連荒旱居民鬻田度朝  
夕猝不能售位南以粟易之歲德任其贖食而無力贖銷契  
還其地者七十餘家不自以爲德亦未嘗一言聞於人其訓  
家以敦倫理崇忍讓爲要年躋九旬修髯三尺餘飄飄有仙  
風諸孫繞膝皆有學行輩聲膠庠里老共句鴻筆生爲文記  
其事捧觴上壽交相嘆嗟以爲積善果有餘慶

賀聖謨監生乾隆丙午歲大饑聖謨推所蓄雜糧二十餘石贍  
給同村戚友賴以全活者甚衆

賀沂儒士於本村施地一區築學舍三楹爲寒畯肄業所庖福  
門垣胥具所費溢二百緡

張電章字雷合嚮儒術重名義初失恃家政夥未得一意力學  
因爲其子延名師課讀子四孫二俱著聲於邑庠族子有以  
歲饑鬻女爲人妾者電章出貲贖歸擇婿嫁之

王銓字天徽號龍溪寶九里人以敦樸端慤式於家事繼母志  
得意先晨潔夕馨藹如也遇鄉曲子弟必規以善言因事措  
指聞者爲聳承父志重繕湛水橋開湛水惠民兩渠修至三  
十里建義塾敷楹其闕懷桑梓善立勝事類如此尤精岐黃  
術有延請諸樸樸於溽暑迓寒中不以爲疲

蔡典監生維室陳氏賢而明承典志命其子宗孟捐田百畝入  
義塾由縣詳請議叙

武永清字天朗監生寶九里人嘉慶十八年歲饑出粟活同村  
寡及鄉衆欲立石以彰其美力止之

馬雲漢字天章寶四里人庠生乾隆五年歲饑以宿糧百餘石  
貸里人踰歲豐稔爭來償雲漢投券於火概不受撫憲雅榜  
其門曰以善及人其曾孫振監生嘉慶十八年以助賑前政  
秦榜其門曰惠施桑梓振次子耀德捐錢一百千助書院膏  
火方伯廉憲同榜其門曰功裨文治

張九成太平庄人與李維思王邵李泰陽公建茶亭於交馬嶺

下施地百餘畝僱人居守司其事又修石橋往來者德之  
陳思學貧甚於路拾八千金歸謀其父曰財命相連何以安若  
人既聞係李生物慨出以給封識依然前政賞以文獎之

孫榮寶三里民少孤貧拾中金百坐待失者徵驗付之又繕土  
橋跨石河以濟行旅其子有仁等承榮遺囑捐地十二畝使  
人耕種歲資以繕橋

楊崑字玉峯布政司理問助修春風亭文塲號房共錢三百四  
十串又重修惠衆橋歲饑施麩數十石食餓者其子監生楊  
嵐清助修十里義學及修水牛郭石橋兩座義學三楹共費  
錢四百餘千

劉貞監生嘉慶癸酉捐錢一百二十千助賑前政秦榜其門曰  
穀我士女

李峩字峩三號雲亭監生好濟貧有乞人病卧地既知地屬峩  
力疾去曰吾不忍生受其惠死貽之累也峩聞而退給衣食  
瞻養之遂瘞里人有墮入刑術者悔而謀於峩峩力保全之  
卒爲良民

崔振基字丕成監生與熊檀倡募重修湛水橋

楊如旃生員荒歲見鬻女者詢知爲故人子婦買而養之歲熟  
歸其夫家旣故人子殤母家以孀女居竒與夫家構訟前政  
謝判歸如旃爲義女如旃擇良家子嫁之歲時饋問無間

岳銳傭力其家致數百金慨出錢一百千繕泊春風亭外橋

鄭雲生字岫斐號桓溪由武生授衛千總銜剛直好施與嘗捐  
錢四十千補綴金星橋

蔡益監生於萬泉河修石橋一費錢二百千

廣純於二郎廟前修石橋一計錢一百千

李培字天篤獨力重修太平石橋又買地爲義路

陳元一倡修公義石橋

白臣於嘉慶九年拾金不昧前政賞以尙義可嘉額其門

丁之亮監生好賑之緩急欸關不以有無爲辭嘗施地一區惠  
死而無所歸者里人刻石美之

丁緒性端方捐地一區建先祠倡族人置祭田數十畝

吳益謙字文吉武舉事繼母以孝聞輕財尚義排難解紛閭里羣推爲長者

郭瑾字公璧嚮名義無所吝惜和睦鄉黨沒猶爲人所思

郭思誠字寶菴業岐黃幾比秦越人年七十餘老矣延請者盈門一次往診不以爲勞亦不計謝實則家無餘蓄也汝州熊郡侯表其門

晉丕承字武烈監生父早逝事母以孝聞族叔道貧無以自存爲置田八十畝養之終其身富家子買廟中物或托丕承言阻之丕承實未知也富家子怒將尋隙闔及見丕承謙遜有禮

不覺自愧其能化人尤戾類如此

王體元字善長監生從弟魁元家貧親老不能自給體元撥田八十畝使耕以養其親歷十年升斗未取精岐黃寡人無力延醫者輒爲診治施以藥尤善啟迪人錫解糾結爲同儕所信如齊梁間之虞寄前政秦額其門曰望重鄉評

李可欲乾隆丙午歲饑戚族里鄰貧而無以養親贍妻子輒計口賜以粟病則資以良藥全活甚多設義塾訓蒙五十餘脯修概不納前政陸表其門

牛夢麟字青閣監生好義不侵爲然諾精岐黃僕僕於赫曦沍寒中爲人診治不少息歿時聞者悼惜子月川能承父志



史重光倡修西街路三十餘丈遇貧瞽者多贈以衣及粟修葺古刹百餘千不居名

王順例貢捐助書院膏火前政謝以積善餘慶表其門

謝得庚監生性忠誠意擴達好善樂施終身不倦嘉慶十九年歲饑出資五十千助賑濟貧毫無貧色前政秦以好行其德表其門

楊卓立職員慷慨好義爲人排難解紛望重桑梓更精岐黃術道光九年八月爲人醫病歸路給錢票三十七千文貼字求主已而張進福尋至詢係所失如數付之進福分半謝不受進福重其義具稟前政崔表其門



武功

螳螂奮臂勢何能爲然而村氓無知往往警及風鶴則夫致力疆場爲軍鋒冠與拒賊而遑護桑梓其人固有不可沒者

國朝

鄭爾珍字上卿大營鎮人明末遭寇變流落南土遂隸荊州軍籍以軍功累官至雲南洱海縣參將以年老致仕

王守鳳字常山陂北保馬新莊人魁梧卓犖讀書知大義善騎射明末避亂陝西我

定鼎應募隸川陝總督孟標下從征效力多戰守勲累官至前營遊擊康熙初年從七省經畧莫南征吳三桂委防魚渡路

朝

以招撫斬獲功授參將是時賊勢猖獗雲貴四川皆大亂我師不能禦而南兵日增各營諸將校人人自危總兵蔡副將王輔臣等遂謀判將襲殺經畧莫使使強公公不可則怵以兵威公大怒手刃使者馳馬赴中營聞變乃身先士卒血戰衝圍孤軍退保黑水峪總督哈以

聞授舊縣副將已而督護軍餉至漢中與賊衆大戰團彪峪斬判將王輔臣生擒逆都司張南秀守備康伯寧等因中傷疾卒於軍

連聯第字捷之寶三里連家庄人有膽識以武生投南陽鎮効用歷官至山西大同鎮靈邱路中軍守備以年老致仕

周維藩字价人邑增生通經史事母以孝聞而尤慷慨好義嘉慶五年教匪滋事藩與其堂兄武生從周胞弟維翰稟領義勇旗獲賊甚衆翟集之役周氏實與力焉

樂魁英陸庄人嘉慶庚申孽監跳梁魁英部鄉勇千餘人憑東郭鳳凰嶺應機設拒盡出其家之宿糧以食衆賊至任家寨魁英乃與王金章李情合各領鄉勇千餘驅賊於嶺下張左右翼搏之奮力死鬪多所擒賊鳥驚魚駭蠅聚翟集閉塞不出東郭二十里居民胥保全魁英悉所俘獲呈之官大兵至遂一舉滅賊同時徐有林亦以計縛賊渠薛三猷之得重賞

王卯茂邑人教匪之變卯茂隨民兵攻其巢賊出衆潰卯茂獨  
抗禦連斃五人賊怒蜂擁擒之賊渠愛其勇以好言誘之降  
卯茂大言不從賊黨以刀剝其皮自頭將至腰口猶隱隱言  
賊愈怒以繩繫其足率以巡行者日餘氣未絕以力剖其心  
乃死同時爲教匪傷足而死者有翟曾戰乏被擒大言不屈  
而死者有丁和率領鄉勇與教匪力戰者有王凌雲

鄉勇王臣等二十九名

見李森義  
勇祠碑記

張克廣等五名

見東閣義  
勇祠木主

又

採訪蔣履貞一名均係庚申之變陣亡事後查出不及具報  
者按陣亡鄉勇李春生等一百七十五人當經司事者舉蒙  
卹邑載入兵事條矣茲此三十五人同一急公死難而未得與

恩

以堪悅焉特附之武功

路順嘉慶二年六月隨 官保部堂惠在四川東鄉縣勦賊得  
功賞給行營千總委票後奉 部議以把總補用

監生練其哲採訪陣亡鄉勇碑記

古人有言曰人莫不有一死死或重於泰山或輕於鴻毛然則  
死之一節貴得其正未可以成敗論英雄也當

朝庚申之歲六月二十四日教匪滋事焚掠庄村七月朔自程  
家集起夥欲渡石河而北大新庄居民李春生孫鴻基等糾合  
鄉勇禦之於三官廟灣河口自己刻以至未初而賊匪大至勇  
共約千七百餘人鄉勇不滿三百所以寡不敵衆本村暨外鄉

助陣戰鬪而死者六十二名帶傷者不備載嗚呼此一死之所  
關大矣哉使當日非諸君舍命相拒則賊衆渡河恣其跋躡石  
河兩岸之間一帶村落安保其不皆化而爲灰燼也乎乃當賊  
匪逞凶之後竟自西南渡水而奔爾時之諸村得以無恙者大  
抵賴諸君一拒之力則諸君雖死猶生矣所讀重於泰山者不  
其然耶今吾儕安享太平諸君死於無辜苟聽其泯沒而不彰  
恐世遠年湮疑以傳疑後之人但風聞禦寇盡節之有人而竟  
莫識其爲誰氏之子也故立石以誌之不惟有以慰諸君子心  
卽以備後人之考核云爾嘉慶六年歲次辛酉陽月望日立石

邑生員王煥充陝西平利縣鄉勇蒙賞六品頂戴

督學鮑給  
匾將大之



流寓

雪泥鴻爪遠觀者未必有所繫着也然東坡記韓魏公黃州詩則以賢人君子偶爾駐足比於金錫圭壁之所在瓦石草木都爲之生光况久於其地締隱業而長子孫乎故志乘例皆誌僑賢

孔叡

宋史孔叡傳孔叡字寧極孔子四十六代孫隱居汝州龍興縣龍山之滎陽城性孤潔喜讀書有田數百畝賦稅常爲鄉里先遇歲饑分所餘贖不足者未嘗計有無聞人之善若出於已動止必依禮法環所居百餘里人皆愛慕之見收於路

輒斂衽以避葬其父廬墓三年卧破棺中日食米一溢壁間  
生紫芝數十本州以行義聞賜粟帛又給復其家近臣列薦  
授秘書省校書郎致仕居數年召爲國子監直講辭不赴卽  
遷光祿寺丞頃之起知龍興縣復辭卒贈太常丞盜嘗入道

家發其廩粟收避之縱其所取嘗逢羸弱者爲盜掠奪其貲  
收追盜與語責之以義解金畀之使歸所掠居山未嘗逢毒  
蛇虎豹或謂之曰子母夜行此亦可畏收曰無心則無所畏  
晚年惟玩周易老子他書亦不復讀爲大元圖張壁上外列  
方州部家而規其中心空之無所書曰易所謂寂然不動者  
與此無異也

王臨川文集孔處士墓誌銘先生諱旼字寧極睦州桐廬縣尉諱詢之曾孫贈國子博士諱延沼之孫尙書都官員外郎諱昭亮之子自都官而上至孔子四十五世先生嘗欲舉進士已而悔曰吾豈有不得已於此耶遂居於汝州之龍興縣而上葬其親於汝汝人爭訟之不可平者不聽有司而聽先生之一言不羞犯有司之刑而以不得於先生爲恥慶歷七年詔來天下行義之士而守臣以先生應詔於是朝廷賜之米帛又勅州縣除其雜賦嘉祐三年近臣多言先生有道德可用而執政度以爲不肯屈除守秘書省校書郎致仕四年近臣又多以爲言乃召以爲國子監直講先生辭乃除守光

祿寺丞致仕五年大臣有請先生爲其屬縣者於是天子以知汝州龍興縣事先生又辭辭未聽而六月某日先生終於家年六十七大臣有爲之請命者乃特贈太常丞至七年月日弟瞻葬先生於堯山都官之兆而以夫人李氏祔李氏故大理評事昌符之女生一女嫁爲士人妻而先物故先生事父母至孝居喪如禮遇人恂恂雖僕奴不忍以辭氣加焉衣食與田桑有餘輒以贖其鄉里貸而後不能償者未嘗問也未嘗疑人人亦以故不忍欺之而世之傳先生者多異學士大夫有知而是言者蓋先生孝弟忠信無求於世足以使其鄉人畏服之如此而先生未嘗爲異也先生博學尤喜易未

嘗著書獨大行一篇傳於世考其行殆非有得於內其孰能  
致此耶當漢之東徙高守節之士而亦故成俗故當世處士  
之聞獨多於後世乃至於今知名爲賢而處者蓋亦無百十  
人豈世之所不尙述湮沒而無聞抑士之趨操亦有待於世  
耶若先生罔不得有待於世而卓然自見於時豈非所謂豪  
傑之士者哉其可銘也已銘曰有入而不出以身易物有往  
而不反以私其佚嗚呼先生好潔而無尤匪佚之爲私維志  
之求

孔鵬

孔寧極之弟也玉臨川孔處士收墓誌弟鵬葬先生於堯山

都官之公又應河石上題名進士孔鳴據此鳴亦居龍興可  
見

金

程天益

翰林講學於邑之庵羅寺見元遺山詩注

董文甫

文甫字國華潞人承安中進士爲人淳質恬於世味於心學  
有所得人知尊敬之而不知其所以得也子安仁亦學道父  
子嘗開居寶豐閉戶不出以習靜爲業朝夕不繼晏如也國  
華歷金昌府判官禮部員外郎昌武軍節度副使王大中以

公事至杞縣卒

中州集

### 方技

志之列有方也蓋本後漢方術傳而無及畫師者馬志特錄  
孔去非或以其爲名父之子歟姑存而不削

### 孔去非

鄧椿

字公壽  
南宋人

畫繼云孔去非汝州寧極先生之後也長於小

筆清雅可玩尤工草蟲作蟻蝶蜂蟬甚可觀生平極留意於  
此凡翹蠕飛動之物必募小兒求之搜求無遺以類置其翅  
羽冊葉中按形爲之織悉畢具